

晚

晴

移

詩

匯

晚晴簃詩匯卷七十五目錄

阿桂 六首

祝維誥 九首

羅文思 一首

許鉞 三首

唐文炳 二首

羅元琦 二首

張九鍵 一首

邊中寶 七首

包彬 九首

徐金楷 四首

程景伊 三首

裘日修 八首

涂逢震 一首

羅國俊 一首

儲麟趾 一首

卜甯一 一首

梁啟心 九首

蔣麟昌 四首

鞠遜行 一首

陳中龍 一首

索祿 一首

徐垣 一首

梁善長 二首

曾尚增 二首

舒瞻 九首

楊鸞 九首

孫良貴 三首

凌樹屏 五首

申甫 三首

法坤宏 二首

田志蒼 一首

戴喻讓 一首

趙由儀 七首

湯然 一首

李繩 二首

王垣 一首

吳可馴 四首

朱仕玠 一首

成懷祖 一首

晚晴簃詩匯卷七十五

徐世昌

阿桂字廣庭號雲巖滿洲旗人乾隆戊午舉人官至武

英殿大學士封一等誠謀英勇公贈太保諡文成

詩語文成歌歷中外受命遠征定新疆平金川討廓爾喀三次圖象紫光閣入掌絲綸久參樞密功大心小欽欽翼翼始終恩禮不渝乾隆中葉後耐圍致齋先後秉鈞康雍以來清明嚴肅之政於茲稍替其所讀心悟諸篇知勳業根於儒術詩亦光明俊偉爲有德之言

感懷用蘇文忠公寄量美叔韻

少小重意氣局踣皆前賢惟知一往樂誰能計萬全而今
衰老矣狂直多棄捐心迹聊自慰功成付與天百憂如蠅
集擾擾白髮年雖塵生還想甯知口碑傳胡不賦歸去恣

意窮芳鮮松竹蔭我廬朝昏飽雲煙涇渭自清濁美醜何
憎妍不見亦不聞幽谷長日眠擷彼南山茶松枝活火煎
一甌滌內熱快意耽靜便豈必覓丹砂妄與神仙緣醉鄉
亦復好遑惜囊無錢

話舊贈錢冲齋觀察

憶昔承師範蕭齋只兩人始從親研削直至命冠巾經歷
風波險甘同疏水貧十年情意重愛我比祥麟

絕域言旋後年華屈指中我方依禁闕君正董河工意氣
芝蘭臭行蹤牛馬風天山同漢水契闊更西東

三載征蠻府天涯笑語溫晨昏欣共數冷暝不須論話舊
成塵影籌邊驗淚痕相期崇令德努力念師門

伊犁軍營

欲掃妖氛淨巖疆戰不休人猶爭馬革天已厭旄頭刁斗
三更月關山萬里愁渠魁何日滅非直爲封侯

大軍次永昌有作

王師毋盡殺脅從貸餘生一將功何有千軍怒未平投戈
收戰骨撤幕返春耕仰喜皇心慰邊陲已息兵

祝維詰字宣臣號豫堂秀水人乾隆丙辰舉博學鴻詞
戊午舉人官內閣典籍有緣谿詩鈔

詩話豫堂與錢蔣石王受銘朱偶圖陳乳巢號南郭
五子詩宗西江而去其生澀宏肆類竹垞雅潔儷秋
錦至其凌轢波濤奪文險固獨往獨來自成馨逸有
拔戟刺壘於兩家之外者詩橐初經王蘭泉侍郎點
定後至道光間其曾孫子虔官叢輔始乞朱小雲觀
察刪存二卷與明甫孝廉西澗詩鈔同時付刻蓋尙
非全帙也

閒立

短籬數家成小村老樹隔水蟠雲根晚來叉手傍檐立九
十九峯青到門

二月十五日尋春過偶園憶朱大

暝風到處動吟魂芳草閒尋近郭村黃耳隔離能認客蒼
頭刷筍自開門春留元亮花三徑飲乏劉伶酒一尊迢遞
京華游子在旗亭新唱與誰論

永平府

北平古郡鎮幽燕城外連峯際碧天孤竹祠荒雲木杳灤
河水駛石梁偏名高漢代推飛將人樂清時罷守邊漫向
盧龍歌出塞牛羊滿地草芊芊

藥王廟蟠松

入門忽怪天色暮白日黯黹沈僧寮仰頭乃見松屈曲落

陰積翠森蕭蕭石穴斜穿走孤幹檐牙低拂蟠深條千年
蛟螭鬪窟宅拏攫雲雨長空搖小者支撐大騰起倔強不
讓相爭超之而鱗甲挾飛動夜靜驚避獨足魑春來霹靂
疑變化波濤澎湃吹旋颿世間崖壑多大木往往百丈淩
丹霄此松奇絕不上竦元氣迴復屯山椒偃蹇別具造物
意束縛豈由人力剽託根得地荷神聖軒農釀化陰陽調
斧斤摧折幸可免霜雪飽經常不凋引鸞巢鶴導仙駕碧
幢華蓋來鈞韶應有芝苓結精液安得採劬餐靈苗

過嵒陽

旅飯荒園罷嵒山此路尋車聲下坡速人影落橋深野日
寒逾瘦諸峯翠欲沈客程嫌宿早薄暮指蒙陰

牛渚磯登太白樓

太白沒已久太白樓尙傳登樓豁達開江天雲帆雪浪飛
檻前我生不見高歌痛飲之狂態但見錦袍烏帽奕奕眞
神仙磯頭明月常依然騎鯨一去何時還山鬼來窺猿猱
嘯馮夷不怒蛟龍眠青山小謝宅安在鏡湖賀監歸何年
誰來共此玩風景江邊酒甕空滿船余旣不能酌一斗亦
不能吟百篇獨有煙霞痼疾可以相周旋君不見蕭尺木
四壁圖名山朝暮供養惟雲煙峨嵋雪匡廬泉雞鳴日觀
泰岱顛明星玉女華頂連蒼茫元氣窺無端恍然置身萬
里間當年太白愛游涉指點虛無應徧識焉能鞭白日兮
御清風拍肩挹袂羣仙中逍遙入極任來往直與此樓今
古同

次陳二乳巢韻

薊門霜落後萬木正凋殘
輓土一吹面西風時整冠
矚人多惜暮旅雁獨驚寒
誰向塵寰外雲山指點看

廣應寺雙松歌

山門突兀迎諸峯曲廊陰合雙白松
蟠根下固穴泉石直幹上走纏虬龍
支撐太古駐日色汎掃碧落窺雲容
流膠入地互凝結元氣護頂相交衝
昨來對此忘坐卧夜半獨起無人蹤
海濤乍驚瀉巖壑天風直與開心胸
鎧光深閤佛殿黑星影寂照僧寮重
因思前代巨璫盛祝釐爭致金錢供
琳宮紺宇不可數未審物力來何從
豐碑久蝕鼯鼠倒惟有兩樹留秦封
笙簫遙接鸞鶴下煙露近承霄漢濃
投階敗鱗自斑剝梳空香葉猶丰茸
經聲梵語有時出山妖木彪何由逢
冰霜已歷千百載天年幸保經春冬
扶持

形勝錄卷之十一
四
倘非龍象力枝柯那得餘橫縱

天聖寺壁觀管夫人畫竹

歸然古剎闕深窈敗瓦殘碑苔蘚繞入門但覺風蕭森壁
掃千竿猶嫋嫋高低僅辨煙墨痕尋丈欲凌霄漢表葉疏
枝勁態絕秀鳳翥龍飛骨尤矯古來妙手豈乏人風骨能
如仲姬少散朗雅有丈夫氣放筆此間作叢篠年深可惜
剝蝕多黯處如昏明處曉當時松雪亦好事蕭寺偕來耐
煩擾瀟湘之景更模糊南二壁松雪作蕭湘圖今已漫滅細想襟期神愈
渺人天尙藉擁護力遺跡莫隨塵劫了

羅文思字曰睿合江人乾隆戊午舉人歷官石阡知府

署貴西道

詩話曰睿舉鄉試第一又辟孝廉方正宰商南蕭城
牧商州皆有異政解組歸優游林下十餘年乃卒壽

八十
有九

宿少岷山

名山久待我乘興到雲窩直欲冲霄漢甯惟愛薜蘿夕陽
西去疾倦鳥北來多今夜且留住峯頭對月歌

許鉞字靖巖號石蘭錢塘人乾隆戊午舉人官廣州同
知有積厚軒橐

晚晴

驟點翻荷葉依然放夕曛池收將退水風揭欲開雲槐樹
疏陰潤蟬聲遠唱聞憑軒舒望眼野色許平分

項三秋子招集湖舫分韻得扶字

夏淺勝春日頻煩折簡呼雲開山聳翠雨足水平湖小艇
收魚笥荒臺賸鼠姑尙餘豪興在藤杖不須扶

七夕雨

不耐爲文媚女牛自甘才分拙如鳩頻年賴有書堪曝此
夜惟應酒可酬蜥蜴呪來三尺雨蟋蟀吟破一分秋問誰
曾見天孫駕辜負人間乞巧樓

唐文炳字奎南號月村晉甯人乾隆戊午舉人官江蘇
清河知縣

江村

村路緣溪曲人家似輞川樹雲低過雨江草細含煙禾黍
秋風外牛羊夕照前誰家伐樵響驚起白鷗眠

聽雨

一夜花梢雨都如落葉聲窗前思婦在聽汝最分明
羅元琦字用璞號崑圃石屏人乾隆戊午舉人官隴西

知縣有蘭陔堂詩集

輓宮保劉蘇村先生

大星中夜隕邊營箕尾宵乘雷電聲一死詎能酬聖主九重早已諒書生鴻文久播推前輩清德云亡痛老成祖奠遙聞瀕父老碧雞坊外送行旌

家大人避暑秀山傳京兆偕諸前輩過訪

納涼依靜院連轡喜經過飛蓋思京國尋蹤到薜蘿夢回青瑣遠地迴白雲多坐隱追仙躅何人爛斧柯

張九鍵字天門一字筦侯號石園湘潭人乾隆戊午舉人官隆平知縣有漱石園詩集

秋日送友人之岳陽

秋水綿綿送客行江干攜手淚縱橫孤帆挂日風前影別

雁嘯霜夢裏聲雙樹半遮雲麓寺一湖初湧岳陽城愁多
莫更登樓望吳楚天連百感生

邊中寶字識珍一字適吟號竹巖任邱人乾隆戊午舉

人官遵化學正有竹巖詩草

詩話竹巖爲隨園徵君之兄隨園詩以清矯勝竹巖則直抒胸臆恬適和平生平寄情山水晚就養揚州偕隨園編歷名勝都爲南游壘篋集一卷傳爲佳話

勸學詩

我甯甘其拙人自逞其巧巧爲世所爭拙乃身之寶恂恂
里巷間樸訥亦自好神凝志不紛性天常自保大木枝曲
拳斤斧弗來擾七竅鑿甫成混沌已就稿

日月有薄蝕金石有虧缺令名德之興弈世無歇絕高節
軼塵倫聖哲足頡頏闕然庸眾伍草木同摧折沒世疾無

稱此語殊痛切媵脩不及時秋風鳴鵙鳩

卧佛寺

半生勞夢寐此日躡雲根一榻懸今古千山爐曉昏鳥飛
淩碧漢樵去入煙村惟有西來樹常棲淨土魂

出山

出山頻顧山山亦神交熟今夜山間雲相隨窗外宿

兜率寺

清磬聲聲徹悠然夜未分山高遲見月竹密靜留雲色相
巖間石空明水面紋立身塵外思共鶴猿羣

歸里後詠懷

吾家連理枝恰符燕桂數伯仲早云殂三人相依附飄梗
過半生頻年不一遇垂老更相憐鬱陶憑誰訴游子從外

來驚愕頻諦顧喜極翻成悲相看俱遲暮有酒卽我醕無
酒卽我醕鶴髮老弟兄悅愛勝童孺目前致足樂莫任韶
光赴珍重此殘年連牀話情素

倦鳥歸舊林飛翔適性天零星幾老友策杖相往還言笑
無厭時文酒追古歡有時乘興出隨意探林泉或阿陵城
下或吾邱臺邊徙倚以徜徉心遠况地偏偶然逢野叟席
地話園田神貌兩俱古真趣誰與傳自反出與處幸無罹
尤愆泊然何所營長此樂餘年

包彬字文在號樸莊又號惕齋江陰人乾隆戊午舉人
有樸莊詩稟

詩話樸莊潛心經學所著易玩李申耆稱其研窮義
理兼綜象數不爲漢宋門戶深造自得詩多紀游詠
古之作忱著緯麗不同浮響

龍山詩

谷口清風吹林間路微白紆迴度石梁山腰劃開闢懸崖
險欲墜中廣上下迫波流緣差差照見天容窄危途螺旋
文斜上百千折洗心有孤亭憩足意良適泉聲咽近澗更
愛澗邊石削若刀劍攢奔若虎豹逸累累瓜垂蔓呀呀蟾
蜍舌珍珠與珊瑚肖形者非一目謀窮幽異神靜滌煩渴
微聞仙梵音花宮隱深碧

探幽興不窮路轉寺門右雨餘山路溼側足敢馳驟崆峒
千入巖鬼工爲琢鏤初進坳堂形氣暖若含酎其旁窅冥
冥惟聞陰風吼緣壁偃僂行路前驚躡後怪石駭心魂仰
面石齒鬬此境難久留出險神猶瞽僧移茗具來掬泉散
浮漚茶煙裊孤細微有白雲逗石花點新綠氣與澗芳糅

幽鳥嘯一聲林際殘陽漏緩步歸山房暝色斂羣岫

游宏濟寺

秋江靜無煙山形恍圖畫晨登燕子磯塵鞅一時卸逕轉
直復曲奇峯若相迓岡巒忽中斷兩崖狹可跨迤石樹無
皮疑是白龍化梵宮隱深雲香風逗林僻娑羅落高陰傍
戶枝柯亞洞穴豁堂皇禪房半相借上有銜花鳥下有投
巖麝緣壁陟高閣山川拓眼界江明匹練橫天際波濤瀉
此境足句留儔侶催返駕徘徊石磴旁歸雲擁足下

竹塘老姆行

竹塘春好花映閭花邊游女紛瓊琚玉葉金枝一老姆蓬
首不整衣無裯在昔天崇盛藩府王子分茅鎮南土如花
之女天人儔清臚橫列修眉嫵曉日吹笙叫鳳皇晚窗罷

繡調鸚鵡皇孫擇婿鄙豪華但選人龍與文虎宣州譚生
英妙姿筆底掣電風雷馳朝爲千詩暮百賦元氣溼楮何
淋漓皇孫一見歎奇絕畫屏當畫牽紅絲參佐風流賓客
盛譚生揆藻滿座靡樓頭指日騎雙鳳鞶鼓驚人隔鴛夢
流離展轉爲俘囚窮鱗眼看釜底游幸遇將軍不好武聞
道能詩色乃柔笑指梅花賦百首詩成當以不死酬口號
不待八叉就詞源浩如三峽流侍史代書欲腕脫高座驚
讀快拍浮筆陣掃開劍鋌利驚魚掉髻倏脫鉤痛定徐思
更慘絕平臺舊館餘殘血紅顏一去斷音塵半鏡懷藏苦
難說絕域窮鄉獨往還月輪幾徧看圓缺月缺果然還復
圓相逢喜劇翻悲切定情正值梅花開金爐那用沈檀薰
百首新篇歌撒帳流蘇夜夜霏香雪莫將鉛淚哭銅駝生

死因緣重締結星移物換幾度春簾前燕子怨家貧奉誠
非復馬家宅東來卜築江之濱行歌憔悴不求仕碌碌飢
驅越與秦丰容一別一回改閨中鴉鬢看堆銀當時鏤玉
嫌釵重此日裁裙喜布新禦窮老去操箕帚王姬能作民
間婦持門辛苦守良人嘉偶到頭非怨偶歌樓舞榭碧雲
遙舊夢依依烏鵲橋莫把殘詩重索笑落梅萬點付風飄

暮春寄遠

閉戶春將去春愁黯慘中酒消殘夜雨人瘦落花風遠夢
情何極清吟思不窮京華有知己曾否憶江東

錢塘詠古

宋祚將移訝鬪星君臣迹似浪中萍黃龍出海朝廷小白
雁橫江戰血腥南國無家歸燕子西臺有淚哭冬青諸陵

麥飯今誰薦風雨蘭亭夜火熒

金陵雜感

萬峯青拜故宮前王氣收時總黯然西下戈鋌飛畫鷁北來笳鼓駭啼鵲春風淚灑桃花扇夜月歌殘燕子箋彈盡淒涼天寶曲江南愁殺李龜年

過姜貞毅宅次徐莘友韻

東海孤臣棲止後清波瘦石總堪傷忠魂黯慘埋殷血諫草流傳想阜囊半劫鶯花梅尉市百年風雅鄭公鄉遺民孝義終銜恤此日誰探智井藏

淮陰侯廟

鳥盡良弓勢必藏千秋青史費評章區區一飯猶圖報爭肯爲臣負漢王

徐金楷字端叔號春卿天津人乾隆戊午副貢有步青

堂餘草

嘉善曹秉章填諱

詩話余家自鄞縣北遷京師再徙天津遂著籍焉四傳至公實爲余六世祖博學多文爲時所重乃僅以副車終遇不竟才積而彌厚本生六世祖面堂公五世祖午園公先後舉賢書辛劇邑高祖印川公以趨庭之學續承治譜大河南北徧歷赤緊曾大父以後科第相承皆公之澤也竹垞選明詩錄先代文格以下八九家歸愚別裁亦登其大父得輿先生之作謹用其例最錄先集以公爲權輿

書馬文毅公彙草辨疑後

魯公碑碣光千古筆鋒奔放丹心吐勁節峻嶒未易攀惟公忠烈堪傳伍桂陽羣孽逞咆哮平踏樞臺列刀斧索篆遺冠勒使降嘈嘈沸沸紛如雨鐵石肝腸那可搖罵賊聲厲雙睛努闔室幽囚四載餘文山正氣歌同譜大筆高題擊笏樓草書儼校消艱苦侍人慘怛註簪花千金一字足

揚謂被繫不屈終殞身精魂蓬勃鳴鐘鼓一時百口盡捐
軀從容慷慨聞畿輔龍章疊沛粵西來香風脈脈生皋澣
廟貌巍巍祀不衰淋漓青史欣追數牘稟猶餘翰墨輝蛟
螭呵護光難腐至今寶燄每干霄雲霞五色迷江浦

晚泊桃花口紀事

洪流八月猶添漲輕舠上下隨波浪晚泊桃花岸口間驚
雷惡雨齊奔放風吼長空更助威妖鯨怪鰐恣排漾燒殘
寶炬地天昏同舟行旅皆惆悵無端動地起喧呼乞命祈
天聲轉壯暗中摸索遠難窺礮礮一耀真魂喪斷維巨艦
上游橫直壓吾舟殊不讓危乎來勢若山崩四圍浩淼無
屏障陡崖百尺旣峻嶒如此深宵誰得上或攜襖被走泥
中或奮攀援相棄擻我聞生死由來總係天呂梁蜀坂何

無恙平生忠信仗無虧今日臨危豈悚妄所嗟存敬遜無
心難空夷險諸塵相但謹周行坦巨波應驅颶母離滂沱
衝風果激怒濤開洄流捩舵走斜偃艤腫不礙小檣桅鼓
柁凌空亦怪哉約略中流勢愈乖迢遞飛驚又幾回長年
三老盡疑猜誰弄波濤戲吾儕轉瞬雲收雨電弛移舟且
復沾清醕平明打鼓乘風去一嘯南溟振八垓

貞烈殷氏行

扶輿正氣凝津水巴臺十丈雲中起慘絕千秋殷氏操西
風一哭崩垣壘十六梳頭麗且莊菱荷製佩芙蓉裳楚楚
蓼蓼花下萼紛紛人說鬱金堂施衿何意遭囂惡穿墉穿
屋紛相度擊碎珊瑚心不渝炙燔任肆千般虐爆爆炖炖
肌盡殘屹然勁節無盤跚眾憤徵歌寫幽恨香風脈脈透

琅玕卓哉太守眞英灼亟遣官司訊帷箔爛額焦頭衽席
間九死餘生猶婉若漫爲好語謝長官搗羽邊篠終諱卻
八龍蜿蜿扶雲車幾日陞皇別城郭我聞古來貞烈煥壇
壝惟拚一死全綱維誰復夜夜深閨月灑徧殘紅泣子規
歎息氏年方弱小珠輝玉潔全貞皎箝口珍談淋烙凶從
容完璞歸青杏不須哭赴海門潮不須憤藉新城杓不須
匕首覓夫人不須鳩羽藏清醪但冀吾生釋罪愆忍令尊
親逢指眦終始孤芳祕自珍亭亭淨植出泥沼淒其一片
泣幽明輕寒五月燕山繞姓氏從教麗泰華參天偉節中
達表郡符一夜到城來裁詩結伴相喧阗或欲陳芻膳外
柳或欲鐫石樹瑤臺我思風化從來起閨廡拍案爲呼眞
節苦仁厚存心鐵石腸大白不涅誰能伍竊忽精魂鬱森

碧蟠天匝地鳴金鼓輿論蓬蓬塞太虛廣陵調絕哀言譜
神鏡尤憑司牧賢寒江月冷香魂吐青冢煙迷貞不埋劍
花彈放春花腐含毫灑淚寫幽光悲歌屢起酬清酤極目
殊恩沛自天特表芳徽傳萬古

讀蔣安頤先生傳因紀此歌

鯨室珠荆門玉含輝韞璞全高躅雄才屹嶺兮氣拔俗清
聲蘭蕙兮詞飛瀑遭時不造兮懷綸黻力葵茹藿天倫篤
有峰千仞兮溪數曲風雨檀橋恣講讀興朝布化兮升遺
伏蒼生霖雨東山卜長揖故人無我辱錦函香奇文緣陶
情鉛槧撫松菊養天德者九十秋訂鴻編兮三百軸嗟罹
祝融之虐兮徒見燼飛而燄逐螭游兮真神燭鑑亡兮慘
萬斛肖潛光兮諡安頤爲報後昆之式穀

程景伊字聘三號莘田武進人乾隆己未進士官至東閣大學士諡文恭有雲塘詩鈔

送同年馮若渠客游平陽

驪駒已駕苦難攀
襜褕被攜囊赴晉關
夢裏白雲龍尾闕
馬前秋色雁門山
驚才定卜三都貴
樂志甯愁六月閒
只悵從游違舊雨
何時樽酒待君還

中秋前五日劉繩庵廷尉移寓奉柬

一枝穩占鳳城西
掃徑誅茅位置齊
借綠短牆雲作屋
攀花曲磴石爲梯
管絃近接扶風帳
書卷長親太乙藜
茶臼筆牀隨處好
當頭明月待新題

移來家具菊初斑
籬落秋深靜掩關
片石剜苔新作沼
小樓挂笏飽看山
退朝詩思爭花發
近市心情似水閒
舊雨

過從容剝啄聯吟暇日好追攀

裘曰修字叔度號漫士又號諾皋新建人乾隆己未進士改庶吉士授編修官至工部尚書加太子少傅諡

文達有裘文達公詩集

詩話文達以文學受知神解超敏喜賓客宏獎後進爲文章不構思每朝廷嘉禮輒奏賦頌館試所爲文詞林皆奉爲程式詩格安雅與唐之張文貞公權文公相近

江行懷古

清詩成漫興濁酒得孤斟芳草自朝暮浮雲無古今江山供野眺風雨入長吟南國經過地勞勞客子心

江左開基後人爭豔霸圖衣冠垂六姓襟帶到三吳對客揮譚塵當筵擊唾壺風流與割據此意久荒蕪

鶯花江總宅風月謝公墩畫舫青溪水紅樓白下門蓮花

更蓮子桃葉復桃根樂府淒涼徧重歌動客魂

晚步書所見

村落蕭疎瓦屋稀
槿籬花謝杞苗肥
趁虛客度深林散
看劇人從近市歸
柳外佛鐙雙碣廢
岸邊漁火一星微
意行乍覺新涼動
習習水風飄袂衣

寄魏懋堂

娟娟美人隔秋水
濃陰匝地寒光起
清砧斷續西風生
數聲飄入遙天裏
白日蕩蕩飛鴉岱
宗遠意青如何壯懷
欲吐空自詫我當把酒誰當歌
去年高會華簪集意氣縱橫
妙無敵舊歡忽墮雨經秋
俯仰人間坐愁寂羊城驪唱
那可聞周西三湘使客吟暮雲徐石落屋梁疑見君

楊柳店有晉太傅羊叔子祠蓋故里也讀壁間舊句
云老決收吳策輒成長律

楊柳陰陰太傅祠行人下馬讀殘碑遺言杜預才堪代斂
手張華計不疑我謂孫王歸洛後略如隋帝破陳時登牀
若憶何曾語下瀨樓船空爾爲

雄縣

疎疎楊柳蕩秋陰瑟瑟西風飄客襟人到中年易哀樂地
非吾土倦登臨沙盤遠戍三關險浪拍危橋一水深北際
南垂大如許夕陽千古此消沈

遼陽州

襄平遺壘此初經一水依然走百靈劫火銷餘千頃淥戰
塵飛盡四山青舊京尙識龍興地

我陽城東五里許別築新

城卽東
京也

仙蹟難尋鶴化形極目海天縹緲外寒雲漠漠雪

冥冥

涂逢震字驚百號石溪南昌人乾隆己未一甲二名進士授編修官至工部侍郎有石溪詩集

落星石

花南硯北一卷石二十餘年共晨夕石從天上墮寒芒人向堂前思手澤憶昔先子宰項城閭閻疾苦按部行羣星燦爛月未明眼前一星墮有聲風吹蕩漾拖金帶頃刻光搖薄蕭艾呼來與隸亟揮鋤峻嶒著手供爬梳移歸草堂結三友霜雪皚皚都不受昔衣擺脫離垢天春去秋來同好醜此星此石居人寰側身茅屋傲松頑風雨不動安如山商彝周鼎紛嫋嫋

羅國俊字賓初號九峯湘鄉人乾隆己丑進士改庶吉
士授編修官至禮部侍郎有館課存餘集

北上周春田主政邀飲小西門酒樓

湘水西來曲曲環卸帆且得暫時閒柳花滿店春陰薄鶯
語留人別意慳萬點落紅衣上雨一痕濃綠酒中山憑君
無限殷勤意爛醉狂歌鼓櫂還

儲麟趾字梅夫荆溪人乾隆己未進士改庶吉士歷官
宗人府府丞有雙樹軒詩藁

饋茶歌戲贈曹地山前輩

昔者東坡論茶墨茶尙白兮墨守黑墨光可鑑水爲用變
現雲煙稱厥質山溪女兒解焙茶初春采采春蘭芽昔賢
品茶先品水始知茶墨非兩家右軍瀟灑愛籠鶯墨中之

聖記永和黃庭乞與山陰客爛熳天真此則那臣全有詩
詩欲仙嗜茶七碗更翩然詩興還從茶味出茶詩落紙如
流泉地山先生後來傑筆陣詩瓢兩奇絕晉耶唐耶帖與
詩突過前人人不識訪友頻來因樹軒軒中啜茗出平原
先生味之良不惡攜歸解眼煮黃昏道子之孫畫全册秋
山凝紫春山碧徧灑珠璣墨未乾倒薤還兼斷釵格擲來
令我喜欲狂許餽旗槍作報章茲墨比茶價億倍恨無茶
山換墨莊吁嗟乎精誠感召物其類聚之所好取若寄君
雖寶墨非戲言箬籠千里無脛至

卜甯一字中三號念亭又號五峯日照人乾隆己未進
士改庶吉士授檢討歷官順天府丞有尋樂齋詩集
春日過丁倣齋皋陸別墅

煙樹侵天碧茅亭一徑開梅根穿瘦竹石榻染新苔鳥喚
憑風落魚游出澗來呼尊邀共飲薄暮未言回

梁啟心初名詩南字首存號設林仁和籍錢塘人乾隆
己未進士改庶吉士授編修有南香草堂詩集

吳退庵曰設林幼負異稟號爲奇童與薌林相國自
相師友既成進士改庶常以父谿父訓導春秋高乞
假南還會相國入對純廟廉知其孝卽家授編修
蓋殊恩也訓導公喜吟詠老而彌篤春秋佳日輒與
耆名老德閒僧曠士往來西湖之上薌林未嘗不撰
杖以從道旁觀者太息以爲善養志者莫設林若矣
父歿哀勞逾節疾遂作卒年六十四

泛舟出東新關至皋亭山看梅同穆門江聲龍泓堇

浦甌亭作

早暄梅信舒新晴漲痕淺小舟銜尾出野塘風正輭遙見
皋亭麓平林白於繭暝煙結會陰頽日下西阪人家依水

住大半花作堰入春已逾旬幸我來未晚相將恣幽探腰
腳猶可勉

清勤堂前後老桂七株家大人花時觴客各賦長歌
小子亦附作

年來買得宅一區十畝不足五畝餘風廊水檻交縈紆蒔
花種竹非自娛歲時往往扶籃輿中間古桂凡七株百年
外物無生枯自有此屋此樹俱想見侍御手植初宅爲顧
且庵先
生故一株北堂高扶疎瘦藤作骨霜爲膚一株南榮青模
糊棱棱硬葉當軒鋪旁有一株尤絕殊盤根拔起孫枝麤
再歲已見爪角舒欲與老幹相撐扶小園疊石疏清渠三
株壓檐如覆盂蔽虧白日森階除其一僻在牆東隅偃蹇
不肯受束拘著花雖好人罕譽有若逸士逃空虛株株似

此皆畫圖涼露一夕香紛敷滿堂滿室連井閭後洋街裏
風呵噓恍踏月路臨天衢我聞青桂之館仙所都又聞金
粟之龕佛所居非仙非佛此境無眼前忽復周吾廬若不
痛飲眞蒙愚平生招隱繁有徒牆頭過酒不待沽折簡立
至羣譴呼黃雪點點黏尊壺飽花氣似餐醍醐阿爺大笑
拉髭鬚看客醉夢騎蟾蜍朗吟直到日腳晡詩成繞樹樂
只且明年此會不可孤乞與大椿揚靈符不爾恐被花挪
揄

冬夜同壽門坐南香草堂聞雁

清坐各無寐初聞一雁過冬心空外警北思夜來多歲晚
驚霜雪天高畏網羅草堂無恙在相對意如何

立秋後三日雨中泛湖

濛濛溼翠滿重湖一楫中流乍有無涼意十分歸枕簟秋
聲幾點到菰蘆水花帶雨弄姿態風柳牽船成畫圖我與
鷗盟幸無負笑他堀堞羨尊鱸

江上秋曉

一天涼露靜江聲望裏蕭然山色明帆影欲隨初日上沙
痕猶認夜潮生風清羅剎秋無浪樹暗婆留舊有城幾點
眠鷗呼不起蒼茫誰共此時情

湖上送春

送春又上郭門船老去閒情未肯捐酒幔歌簾前代夢水
萍風絮一湖煙誰家櫻筍能留客明日鶯花不值錢白髮
青山兩無賴第三橋外草芊綿

秋晚小集壽門出藏茗洞庭春餉客分體得六言

掃擗青棠樹底遞泉烏石山垞秋風秋雨留客一椀春浮
洞庭

此鄉大好魚舍何年更富茶租準辦布帆十幅共爾春風
五湖

初夏泛湖至孤山作

一篙新漲裏湖寬小雨飛來作夏寒山翠忽低林影合杜
鵲聲裏倚闌干

蔣麟昌字靜存陽湖人乾隆己未進士改庶吉士授編
修有菱溪遺草

詩話靜存年十六舉於鄉十九成進士入翰林卒年
僅二十二歲其七夕詩云一報雲中簫鼓喧羊燈無
焰三更碧盃蘭會詩云兩岸紅沙多施舞驚風不定
到三更語有鬼氣武進劉文定爲作集序有就河鼓
以陳詞三更焰碧會孟蘭而說法兩岸沙
紅詩識先成誅詞安屬之語卽謂此也

致酒行

北風吹凍雨打戶聲瀟瀟兀坐心不怡衝泥步南郊南郊
古梅色皎潔如瓊瑤絳者或間之又如朝霞明層霄曲曲
村外村行行橋畔橋青帘茅店三尺飄當鑪少女年垂髫
竭來願瞻興不淺呼童邀客沽醇醪客聞我言大拊掌爲
言良會思前宵眾醉君獨醒轟飲嗤吾曹聞君持酒戒酒
政胡重料我言客太拘矯枉殊非高達人貴性適有時鋪
其糟憶昔客北平身穿敝黑貂雪花大於鴉驚沙如怒濤
千樹盡僵脫百草無茁茁哀笳揭天風斷雁時叫號北酒
斗十千傾囊不足供焦羔今值故鄉樂況復梅花朝幽香
天半下仙子絕勝錦帳纏紅綃眼前景物詎易得忍使春
色悲寂寥君不見古人千日不飲飲必醉橫眠倒載何道

遙入生束縛多鬱陶興到卽飲從吾豪

贈張聖菴

茅屋當山挹翠微半生磊落遜何肥桃花討論思元老瓠
子陳書只布衣千里長鯨橫海去九秋高雁拂雲歸華封
終古誰分席未到抽簪願已非

袁子才招同年卜五峯邵星亭陳紫山徐紫汀程巨
山徐亮彩集平臺次子才韻

瓊花零落珊瑚樹赭羅香襪渺何處天上明星幾度移高
臺百尺空蟠踞神仙朝騎鶴背來坐看白雲不知去奇語
鑿開五色天願我以茹彼以吐主人邀我朝酒星旋傍龍
頭吸甘露雙童手擎縹粉壺冰桃雪藕知無數醉揚羅袖
逐飛鳥長松篩陰挾風怒意氣渾如出岫雲舉頭欲向蒼

穹訴東方日出徒勞勞雕輪碾塵走煙霧可惜人間盡劫
灰溪流不記當年路撥醅百甕意獨厚跼踖都爲俗所誤
安得義和更倒行不教座客知天暮

悼烏蒙馬歌應甯郡王教

秋雲著樹寒凝紫朔風如刀百草死六閑鼓泄聲不起幽
泉沈沈泣龍子玉勒金韉委流水羅幃匝身薄於紙相將
一曲行路難烏蒙煙樹十千里

鞠遜行字謙牧號未峯山東海陽人乾隆己未進士改
庶吉士授編修有核實書屋詩草

泊燕子磯

倒影涵波返照紅動搖金碧大江空錦帆一片寺前落入
李將軍圖畫中

陳中龍字漢麓安陸人乾隆己未進士改庶吉士授編修有竹塢詩集

珠泉

長嘯下雲根振響雲生鳥一泓何澄瑩窪然貯山脈豈有靈蛇蟠亦非蛟人宅脫手牟尼珠累累浸寒碧空中幻泡影俯仰思往迹無乃謫仙人歎睡留精液爲我濯塵纓流連日將夕

索祿字敏亭滿洲旗人乾隆己未繙譯進士授宗人府主事歷官御史

游上方山

層巒飛閣勢重重十里遙聞薄暮鐘傍鶴巢邊攀古木向雲升處上高峯光浮溪水天心月響作濤聲澗底松洞府

相傳多勝迹待隨僧去訪仙蹤

徐垣字紫庭號芷汀大興人乾隆己未進士歷官貴州布政使

漢川道中

古色晴川路孤篷遠客舟江聲連夏口帆影入荊州臨水村成市沿隄樹欲秋不堪聞畫角日暮又句留

梁善長字崇一廣東順德人乾隆己未進士歷官建甯同知有鑑塘詩鈔

詩話崇一初官陝西白水縣繼攝蒲城蒲城人語曰一文不取清白如水經綸滿胸多謝梁公嘗編廣東詩粹以彰粵雅

泊蘭江

川暝舟初泊羣峰夕照中晚煙浮樹碧漁火燒崖紅流恨

無如水吹愁欲借風醉吟何不可江月故人同

登鰲洲塔同陳石樵

浮圖七級寶安西共倚危欄望欲迷水繞鰲洲桃浪闊天
迴鵬嶺澗雲低蔗苗綠映村邊路菽萁青延壘上畦轉眼
花飛春又暮可堪歸鳥向人啼

曾尙增字謙益號南村長清人乾隆己未進士改庶吉
士歷官郴州知州有平定雜詩桐川官舍聯吟草舟

行雜詩

詩話南村有女衍綸至孝郴州官舍火衍綸母病瘵
欲負以行力不勝救者入非母出不肯出卒同燼焉
衍綸時年十五
彭尺木爲作傳

盤石關

盤石關前石路微離離黃葉小村稀斜陽忽出奇峯影千

疊晴雲屋上飛

晚飯太塘嶺緣隱庵

太塘嶺下好停車小憩茅庵日已斜
藜莧嘗來偏有味鷄鵝隨處可爲家
夢中雲樹迷千里壁上煙嵐識九華
最喜僧雛能解事殷勤頻獻與香茶

舒瞻字雲亭滿洲旗人乾隆己未進士官平湖知縣有
蘭藻堂集

詩話雲亭少擅詩名作宰浙西攬湖山之勝詩格益復雅練佳句如菜花黃隔路春水綠平隄市聲隔浦斷野色過橋分性愛登臨同謝傅志存溫飽愧王曾風料峭時偏抱病月團圓夜卻離家均極流動

秋日同龍威游金粟山

瀕海多奇峯勢若神所鏤入秋事登陟緣畦窮野堠豁茲耳目奇失喜脫塵囿晨光澹疎林嬌雲蔽遙岫陰磴垂千

尺巉絕穿積溜蜃閣時晦明洪波或吞受風雨來半空蒼
茫失晴晝俯瞰千村迷屹立一峯秀賈勇探幽景小憩得
梵構雜花媚秋容暗泉噴幽竇了了浮修眉丹青妙刻繡
剏造自孫吳殘碑不可讀但能辨旃蒙漫漶迷蝌籀弔古
餘遙情興廢理孰究東望秦駐山坤維相躡就圖經九十
九羅列如釘餽覩此造化工靈境爲輻湊此中有芝田或
者羣仙耨摩抄長松下恍聞笙竽奏野衲建精藍忍草徧
寒螯蠲渴資茗柯清氣溢襟袖暫解人事縛一與煙霞覩
同游競躋攀吾意仍稽留微吟憺忘歸餘青戀回首

上巳東湖泛舟

三月三日天氣晴春風處處嘯流鶯天桃穠柳鬬生意踏
歌陌上餘冶情我來暫借東湖住萍絮因緣惜前度湖頭

物色未全非九峯遙對煙鬟暮當時一歡火迫餘南帆北
馬歲月虛花時且酌尊中酒樂意還同濠上魚古今事業
一彈指成佛生天亦妄耳何如閒喚水蘭舟吟徧六橋好
煙水

諸暨

乍識楓橋路偏驚過客魂亂雲埋虎迹健水嚙山根野店
春無酒人家晝掩門前峯好眉黛應似苧蘿村

花街道中

一雨羣峯綠登臨適野情嶺雲寒不散澗水晚逾清竹裏
茅檐小山根樹影平田家勤力作蓑笠事春耕

寄巢爲杭堇浦太史作

乾坤到處盡吾廬小住爲佳可著書半榻茶煙欹枕後一

東華集卷之十一
春花雨閉門初名山已得輕身藥曲巷時通問字車回首
東華塵十丈西清風味竟何如

新巷

空林一徑破秋煙選勝無如此地偏但把茱萸酬暮節何
須絲竹寫中年千重紅樹新霜後四面青山落照前去去
不嫌歸路暝滿湖漁火送游船

過碧浪湖

東西苕霅水迴環清絕吳興占此間浮玉塔前搖舫過一
螺青處道場山

清明日鐵珊招同泛舟東湖歷游諸園

芙蓉隄畔十杉亭芳草芊芊滿釣汀更上水明樓上望遙
山九點海門青

五層塔影倒波心野寺門開春水深剩有山僧公案在石
泉槐火鬪清吟

楊鸞字子安潼關人乾隆己未進士官邵陽知縣有邈

雲樓詩集

詩話子安嘗舉鴻博及成進士初官蜀繼官湘迭宰
健爲醴陵長沙邵陽諸縣皆有政績詩高亮明秀不
爲伉厲之聲

感懷

芍藥與黃菊結根固不同懷芳未及採一夕來朔風朔風
何造次吹我客牀空客心與客夢倏忽若飄蓬寄謝西園
花此意殊怱怱

抱膝慘不樂念我同門友當時豪俊人零落如參昴匣中
流泉琴棄置今已久豈不懷古懽道遠難聚首以我憶君

心知君與我厚珍重歲寒交無爲反覆手

長城

秦皇築長城乃爲萬世利連山絕谷勢蜿蜒雄圖自足制
中外當時重設險已有趙與魏何以後世人獨罪始皇帝
虐用其民虜使其吏仁義不施方欲帝萬世豈知李斯能
亡秦璽書一發長城隕吁嗟秦皇乃爲萬世戒

書江烈婦傳

烈婦姓黃夫亡服除夫生日詣墓哭
自刎死袖尺縑書天清地白四字

翦紙作香香不滅生綃畫花花不涅三年石鍊女媧心一
夕竹斑湘妃血秋風蘭菊悴幽姿松根澈泉無轉移天清
地白長如斯炯炯夜臺相見時

除夕

除夕親幃遠天街露氣清誰家今夜酒不動故鄉情脫手

成疇昔間關懷友生巡簷看北斗迢遞接秦城

古浪峽

峽口秋光早客行日易曛參差石磴澁厯亂澗泉分一徑
落黃葉四山生白雲郵亭何處是涼雨已紛紛

登廣成觀北樓

高樓岌嶸勢凌空乘興披襟欲御風地控河山開莽蒼雲
連晉豫入洪濛野花寂寂春蕪綠廢苑悵悵落照紅曾是
廣成傳舊迹何年躡履上崆峒

盤豆驛

盤豆驛前日欲沈高高新月映疎林一溪澗水數聲雁何
處能消關外心

劍門

劍門高閣倚崔嵬蜀國風煙一線開怪石當關森似削驚
濤歎地殷如雷人矜絕險空詩筆天入中原失霸才欲問
勒銘千載事暮雲飛處亂猿哀

孫良貴字鄰初號麓門善化人乾隆己未進士官甘肅
安化知縣有墨樵詩鈔

偕家弟文止曉入嶽麓寺

幽仄還從到同游暢所經僧披深翠山寺帶溼雲暝寒竹
新炊火霜禽飽曬翎五年矜一見不負看山行

贈百四十三老人湯雲山和沈宗伯作

天上老人自有星翩然披髮下炎坰樓頭黃鶴何年返騎
向蓬壺訪蔡經

吉陽湖

皖城西上借東風極目洪波水正東忘卻江天空復迴吉陽湖看藕花紅

凌樹屏字保釐烏程人乾隆己未進士官咸陽知縣改嘉興教授有匏息齋集

行路難

莫恃顏色好顏色易成暮莫恃君恩深君恩易成故色衰愛移會有期金屋長門無幾時君不見駿馬折股車折軸尋常平地有翻覆何況孟門之巔太行麓

有手但荷鋤有口但飲酒荷鋤無賢愚飲酒忘是否人心變幻夫何窮飢仇飽恩如追風老子畏避走胡中劉翁強解事下視人間世薄天帖帖彼爲誰玉龍十二鞭不逝吁嗟乎天帝之尊猶爾爲羣生悶悶何所之

人生不滿七尺軀其志乃欲奠地維立天樞智窮力竭安
所就里巷小兒往往起而笑其愚天不可作曲蓋倚地不
可作磨盤舞夸父追日終野死何況一夫蹇蹇欲與造物
相撐拄北叟移山期子孫上帝聞之畏其言吾徒作事須
如此要使精誠貫九閭行路難行路難君不見龍逢比干
身已死當時誰說有忠肝

東家有賢女修行揚清聲西家有賢女落落無時名匿彩
潛光世不見西家反向東家羨鉛華刻意爲摧藏不特人
忘家亦忘始知眞品入時難國香誰識林中蘭野花叢叢
舒豔蘂露冷煙深採未已此時賢女方深居肯學東家殉
虛譽春華秋實各有時慎莫但取天穠枝

重寓陸氏是亦山房有感

苔衣繡檻綠初齊曲曲閒尋路未迷清供居然鮭廿七故人依舊屋東西襟懷聊復同沂水箋注何妨到玉谿一卷尙書全部論古來不少樹雞棲

申甫字及甫號笏山浙江西安籍江都人乾隆丙辰舉博學鴻詞辛酉舉人歷官副都御史

七月朔日籀石招同地山少宰小集山齋爲鴻博同年之會次韻書籀石所畫三友圖後

山館涼生面面風何分賓主此情同故人海內今餘幾往事樽前話不窮各有姓名留薦牘儘多酬唱入詩筒衰遲倍切齊年誼氣類相關在始終

接葉亭邊落葉寒紛紛送客出長安

丙辰秋冬之間厲樊

耕石汪槐塘諸君同寓於接葉亭

試畢先後出都同人咸於此餞別重來我只常資進晚達

君猶本分官未敢便為徵士老不妨仍作布衣看風流畢

竟推前輩早向雲霄刷羽翰少幸由乙卯中書丙辰中式改庶常予與籀石並為後進

尺五城南集眾仙歡場一散逐風煙庚辰初夏劉繩菴相國邀同裴漫士司空

王晉川廷尉陳句山太僕楊二思侍讀王孫同觀察會多於華亭相國舊邸之錫壽堂時余與少宰閣學亦與焉

生那得離文字後死何容卸仔肩醉後吟聲驚戶外雨餘

山色入窗前八人尙有三人在似得天憐亦自憐

法坤宏字直方又字鏡野號迂齋膠州人乾隆辛酉舉

人官大理寺評事

竹西書屋

園風索索吹井汲海雲凍合低平隰羊裘毛脫酒力微枯

倚青松坐白石昨夜雪花大於掌隨風飛舞棲檐隙山陰

有權當詣誰擁書兀兀抱雙膝竹竿壓折不開門歲晏無

人空歎息

戊辰九月六日贈別毛其人歸里

調刁隕風葉翩反戀故枝聞君束歸裝游子動離思行行
高原上竚立望征驪仰視歸飛鳥心隨白雲馳初君登科
日英姿生光輝輕裘擁高坐煥若東出曦風塵近十載奔
走長安達黑貂旣已敝面目空復黧哀我龍鍾態對歎不
自持計君歸閭門升堂拜慈幃呼洗爲兒盥呼食哺兒飢
功名豈不念顧亦愛其私小人亦有母白髮兩肩垂自春
徂秋夏遠游厯三時家貧失儒業諸子任游嬉乃從千里
外爲人章句師奇字不堪煮九月未授衣行將舍之去掛
經把鋤犁小珠山之麓書帶草離離先賢有遺訓良田在
耘耔養志事躬耕相約共畚菑將子無寒盟春深以爲期

田志蒼字東山號春曉大興人乾隆辛酉舉人官燉煌知縣有翺羽堂詩草

早行西直門外

曉發霧濛濛垂鞭野徑通平橋煙水北譙閣樹林東
賸有兼葭綠還生菡萏紅翠微經雨後高巘倚天中

戴喻讓字思任號景皋漢陽人乾隆辛酉舉人官惠民

知縣有聽鵬堂春聲堂諸集

詩話景皋嘗作伏劍謠取古來不平事悉翻成案爲快意語介推還受祿屈原適樂國古人已先有爲之者又有臨漳曲結句云看君橫槊對東風老年欲作喬家壻爲隨園所稱

赤壁

未必功成後山痕便劫灰千年無戰伐此地有樓臺
夢醒人俱古天空鶴自回深情吟兩賦江上幾人來

趙由儀字山南南豐人乾隆辛酉舉人有漸堂遺草

詩話山南與武甯汪軻南昌楊屋鎔山蔣士銓號四才子年未三十而卒其詩清而不厚吐屬要非凡語

出門

出門茫茫明日異鄉川路修阻煙波無梁飢寒驅我不知
其可悠悠素懷生事相左南山採葛北山採薇各抱紛紜
誰爲相悅慷慨微吟風雲苦陰英雄有淚兒女何心

感遇

後凋美清松嘉樹頌朱橘當其歲寒時眾口亦如一豈知
風雨來桃李發豔質依然成故蹊不復念蕭瑟感此傷浮
沈白眼觀天日悲風起空山爲我耿紆鬱

曲逆不盜嫂塞侯不竊金數奇值讒口頗疑天下心人生
非木石豈免多故侵文侯封謗書千載悲知音

女媧鍊采石遂補西北天愚公負太行山岳東南遷天傾
亦可補地險亦可平人心終岷嶲何乃莫救焉惜哉大宗
師在司鑪炭權真宰不可問俯仰心茫然

丁卯寒食前一日汪輦雲滕王閣分賦

蕭然懷抱欲悲秋古樹荒煙出荻洲如此山川常作客平
生心事在登樓文章有氣精魂在牛斗無光劍影愁不盡
天涯今日意江風吹爾秣陵舟

題黃婆洞流月池

陰厓白日寒飛瀑散雲霧可惜水晶簾流向人間去

秋日西城遠眺

荒邑西風觸樹鳴出門延首向西行白雲村落半明滅黃
葉人家時雨晴城角又催臨暮調野春閒送隔溪聲登臺

我亦悲秋客作賦長餘宋玉情

湯然睢州人乾隆辛酉舉人

夷門

夷門駐馬立踟躕烈士遺蹤尙有無公子若非盧左騎侯
生祇合老窮途風吹汴水孤村暗木落秋城塞雁呼日暮
荒原何處望千年頸血灑平蕪

李繩字綿百號勉伯長州人乾隆辛酉舉人有封田剡

東諸集

詩話王西莊彙刻江浙十二家詩選勉伯及江韓懷
姜檢芝蔡企問王岡齡張鳳于顧學遜高同泰廖琴
學薛少文吳赤玉趙陟庭多西莊友及門弟子岡齡
其弟陟庭其甥也諸家詩皆姚武功戴石屏一派篇
幅稍隘情韻自饒

歸舟抵無錫望惠山

形勝集卷之二
塔影入孤城帆迴落照明客同歸鳥倦山似故人迎野市
橋邊酒春煙隴上耕何當訪僧寺汲水試茶鐺

楓橋夜泊

又復恩恩賦遠征烏嘯霜月若爲情寺鐘漁火楓橋泊已
是思家第一程

王垣字紫亭蒲城人乾隆辛酉舉人有嘯雪堂集

古滄州

頽墉十餘處云是古滄州茅店行人歇荒橋野水流鬱蒸
初向夏寥落不關秋氣勢吞空闊由來踞上游

夕陽村

鄭國渠連客路長晚風吹送野花香夕陽村裏村春急又
向村前望夕陽

吳可馴字驥調仁和人乾隆辛酉副貢有南澗詩鈔

沈椒園曰吾友吳東壁先生有三子皆賢而好學長名可馴字驥調少卽以能文稱乾隆六年應鄉試入都僅以副榜貢成均乃摭其磊落之氣於篇什而詩逾工嘗赴宣化葺郡志凡塞外之土風山川草木之狀類秦漢以還之事蹟盡挾其奇閱以成書爲北方圖經所僅觀

九日袁子才庶常寓中平臺登高

平臺高倚梵王宮無限秋光到眼中一片閒雲沈遠塞數行歸雁界晴空可無黃菊酬佳節只有青山識寓公迴首故園風日好茱萸插帽幾人同

集苔花館題陸包山承天寺福興院畫卷

姑蘇遠近高低寺六十坊前慶雲被剎幢最古是能仁殘碑勒載蕭梁事北院禪棲花木深名流往往高軒寄誰與題壁抒麗藻石田倡韻楊祝次二公雄筆鎮山門直等江

心玉帶視六丁一夕下取將隔代吟魂熟招致包山水墨
化結習濡毫灑灑含清思失詩乃以畫補之畫成詩亦復
附志完斯公案非偶然詎獨老僧愛文字何時散軼來北
原收入米家書畫記落花主人癖嗜古寶此不啻千縑值
長夏招要避暑飲傳觀競樹詩壇幟塵世茫茫感廢興我
來把卷發深喟前人捨宅剏浮圖後人據寺竊閨位可憐
築土號三興黃葉西風驚夢寐日光懸燭火息後宮滅
盡雙蛾翠蘭若粗能復舊觀劫灰旋又幾銷毀斯圖歷今
二百載前輩風流故未墜乃知壽世重文墨作緣底用金
布地展之壁上當卧游疑有濤聲出松吹

太鴻徵君別買小舟以詩見示戲答

扁舟穩坐瘦維摩搖膝孤吟意若何自比襄陽泛書畫真

堪笠澤狎煙波片帆緩渡山容出一榻涼收水氣多還有
柁樓雲鬢在卧聽子夜發吳歌

同椒園丈登蓬萊閣謁東坡先生祠卽用先生取石
韻

高閣涵遠春我來春欲改長風起暗潮萬頃琉璃碎上映
丹青壁磳硯分錯采下泊彈子渦噴薄珠石琲撫景懷古
人先生遺像在想當守郡時談笑吐雲海雄筆振神山壯
觀空大塊祇今讀殘碑和者誰與對歎絕茲游奇客抱豁
以解歸路指東萊花開猶我待

朱仕玠字碧峯號筠園建甯人乾隆辛酉拔貢官鳳山
教諭有溪音集

彭蠡

彭蠡渾無地茫茫天共青
秋風欲下雁落日正揚舲
北會分吳楚東流接洞庭
漁歌乘夕起愁絕若爲聽

成懷祖字尙義號北樵大名人
乾隆辛酉拔貢官邠州
州判有關西橐草

對月

吏閒眞似隱寒柝靜宵分
明月空廊得哀鴻獨夜聞
風吹松作雨山縱火燒雲
幽境誰知者孤吟寫斷紋

晚晴移詩匯卷七十五終